



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimyim@gmail.com

TAPAK 8

Yangia anidakangma :



Tir Yimyim



tir\_yimyim



tir yimyim

TAPAK 7



**Oman team nung head coach Sulakshan Kulkarni kumogo**



**Pakistan-i Afghanistan den sensak asemtsü memulunger**

VOL. XXIII ISSUE NO. 137 (ADOK 137) DIMAPUR AMUNGNÜ (SUNDAY) METSÜREMI (MARCH) 01, 2026

₹ 5.00

## Iran defence minister Nasirzadeh tepset

New Delhi, February 28, 2026 (Agencies): Honibarnü US-Israel ajanga amakdang Iran defence minister Amir Nasirzadeh aser Revolutionary Guards commander Mohammed Pakpour na tepsetogo ta osang angazüker.

Nasirzadeh-i Defence minister meinyakdak Iranian armed forces nung deputy of chief of staff inyaka liasü.

Israel Defense Forces (IDF)-i tanü "OPERATION ROARING LION: IDF aser U.S Armed Forces nati Iranian kiralonggraba sorkar atsüngdoksü aser Israel asoshi lendongtem agientsü atema joint operation ka tenzükogo" ta metetdakja liasü.

US aser Israel-i Honibar nungi Iran amaksü tenzükogo aser parnoki Iran nung tongtipang lenirtem dak tenük yoka amaker. Iba atema Iran-ia tayang küpzüka Israel aser US sepaitem amenoka aliba Gulf linüktem- UAE, Bahrain, Saudi

Arabia, Kuwait dak missiles khaloktsüogo.

United States asoshi security lendong anentsü aser Iran-i nuclear weapon meyanglutetsü atema amaker ta US President Donald Trump-i metetdaksü.

Pai Iranian security forces dang prangpong-injang toktsütsü ayongzükogo aser Iran nunger dang bombing anenba sülen sorkar atsüngdoksü ayongzükogo.

Onoki Iran Supreme Leader Ayatollah Ali Khamenei aser Iranian President Masoud Pezeshkian naprong amak ta Israeli ketdangsür kati ashi.

Iba mapang Tehran nung Khamenei maliasü aser pa lendongnungi jembua alitsü tesem kati anir ogo ta osang ka ajanga angazüker.

Honibarnü amakdang Iran Revolutionary Guards nung senior commanders aser political ketdangsür aika tepsetogo ta Iranian osang ka ajanga ashir.

## DMC councillor 2 NPF nung aden

Dimapur, February 28, 2026 (TYO): Dimapur Municipal Council (DMC) nung National People's Party (NPP) councillor anati Naga People's Front (NPF) nung denogo aser iba ajanga ward 23 nung NPF councillor 17 kumogo.

Ward No. 23 nungi councillor Jonathan Yepthomi aser Ward No. 7 nungi councillor Nikali Sumi Chishi na den tena pusemertemi Honibarnü NPF nung aden.

Iba ajanga NPF-i Dimapur nung alirtem tenzüktsü nangzükba akangshitsü imlar. Councillor anaprongi nübertem asoshi külemi longjemer inyaksü nangzükogo.

Central Office nung DMC councillor ana pelashishia agizükba sentong nung MLA & NPF Secretary General Achumbemo Kikon-i o

jembidang "regional political party ana loktepba ajanga nübertemi Naga nunger aser maitüsü kümzüka ayutsü asoshi regional political party tashitait ka nungdakba angatetogo" ta ashi.

Chief Minister Dr. Neiphiu Rio-i party President inyaker aser pai Naga nunger asoshi mangdang tulu yua lir aser iba ajanga nisung aika NPF nung adentsü ajungmesor ta paisa ashi.

NPF ya tashi angaba party ka lir aser tashiji teküpoktiba jengang nung lir anungji lenir anati nübertem tezü metangdaksütsü saka mapa tajungtiba inyaksü ayongzükger ta Achumbemo Kikon-isa ashi.

Iba sentong nung DMC Chairman Hukheto Yepthomi aden aser paia NPF dang councillor tasen ana agizükba atema pelaba metetdaksü.

## Arishi kum 14 tain tetsürtem asoshi HPV vaccination tenzükogo



February 28, 2026 nü Naga Hospital Authority Kohima nung nurse kati HPV vaccine tuloktsüba angur.

Kohima, February 28, 2026 (TYO): Nagaland sorkari Honibarnü Human Papillomavirus (HPV) vaccination programme tenzükogo.

Iba ya tetsürtem dak cervical cancer madoktsü aser samatsütsü atema lir aser arishi kum 14 tain tetsürtem nem vaccine angati agütsür.

Tanü Prime Minister Narendra Modi-i Ajmer, Rajasthan nungi linük ajunga asoshi tenzüktsüba den külemi Naga Hospital Authority Kohima nung state-level launch sentong agiogo.

Iba sentong nung Chief Minister Neiphiu Rio adentsüba liasü saka Assembly budget session agitsü aliba dak sendakba nung mazungba agi medentet.

Arishi kum 14 tain tetsürtemi Nagaland kübok government health facilities ajunga nung Human Papillomavirus (HPV) vaccine agitettsü.

"India aser alima nung cervical cancer ya public health concern tulu rongnung ka lir" ta Commissioner & Secretary to the Government of Nagaland, Anoop Khinchi-i ashi.

"Cervical cancer 99.7% tashi

genital tract nung HPV tapu balala aliba ajanga adokba lir" ta pai ashi.

"India nung kumshia cervical cancer tasen 1.25 lakh shi puteter aser nisung 78,000 shi asür. India nung cancer ajanga tetsürtem asüba nung cervical cancer ya tanabuba lir" ta Anoop Khinchi-isa metetdaksü.

Cervical cancer ya arishi kum 35 aser 55 tsüngda tetsürtem dak kanga atonger aser iba ajanga kibongtem aser tanur anepalua anitetba nung kongshir, ta paisa shisem.

Cervical cancer ya vaccine ajanga noktangteter aser iba campaign yagi arishi kum 14 tain tetsürtem dak Gardasil 4 vaccine dose ka agüja vaccinate asütsü nükjidong lir ta Khinchi-isa ashi.

Iba vaccination drive ya ita asem piyong agitsü aser idangji government health facilities nung anogoshia HPV vaccine angutsü. Government health facilities nung cold chain points aser medical officers lir aser parnoki Adverse Events Following Immunization (AEFI) anepaluteter. Iba special drive agiba sülen routine immunization anogotem vaccine

angutsü ta paisa metetdaksü.

Iba vaccine agitsüba ya pai mulung aser tsürabur mesüra tereprangertem nungi temelaba agir ang agitsü ta Khinchi-isa shisem.

World Health Organization ajanga cervical cancer samatsütsü asalentong yanglua lira ser 2030 tashi nung arishi kum 15 matongba tetsür 90% shi nem vaccine agütsütsü nükjidong lir ta pai ashi.

"Iba kasa mapang arishi kum 35 nungi 45 tsüngda alir tetsür 70% tashi screen asütsü aser cervical disease aliba tetsür 90% anepalutsü nükjidong yua lir. WHO-isa linük shia nung tetsür lakh 1 shia cervical cancer pezü dak tajemba dang asütsü tebilemba lir" ta Khinchi-isa metetdaksü.

Nagaland nung vaccine agitsüpur shiai HPV vaccine agitsü aser cervical cancer nungi jembua alitsü ayongzükger ta paisa ashi.

Iba sentong nung Health & Family Welfare Director Dr. Sendimeren Aonok menden liasü aser Chaplain Vikepa Tepa-i Tsüngrem nungi temoatsü meshia sarasadem.

## Khristan yimsü ya tanülairen lir, lendong masü: Sambormi Lyngdoh

Shillong, February 28, 2026 (Agencies): Jaiñtia National Council (JNC) president Sambormi Lyngdoh-i Khristan yimsü aser temzüng nung India nung Khristantem nem temeten balala agütsüba pusema jembio.

BJP lenir Sunil Deodhar-i Khasi Hills nung Khristan tamangba yimsü anema jembiba atema Lyngdoh-i Honibarnü iba o meyiptsüogo.

"Khristan yimsü ya tai tangatetba agi memeyipsatsüla mesüra yimtenren den memeyokteptsüla. Khristan yimsü ya Yisu Khrista nung ajemdaker tanülairen tamangba ka lir. Iba ya alima mesüra political ideology ka masü" ta Lyngdoh-i ashi.

"Khristan yimsü ajanga temeim, pei sasa mulungtetba aser yimjung indang sayur aser tashiyim agi yimsü

melendaktsübaji Khrista tesayuba anema lir" ta paisa ashi.

"Khristantemi India nung tamangba yimsü ajak akhümtsübur aser kasa akhümtsübu imlar. Onok Khristantem asüba agi India nung masü ta mashir. Iba linük nung tanga sensotem indang Constitution, ozüngtem aser temetentem sülen Khristantemi anidaker" ta Lyngdoh-isa metetdaksü.

Putiotsü nung Khristan yimsü ajanga reshikangshi ajurua aruogo saka tashiyim mesüra tashi agi masü tamangba aser tanülairen nung amendakba asü nung ajak kokteta aruogo. Khristan yimsü anema noktakba mesüra tenük yokbaji tamangba yimsü mangatetba ajanga lir ta paisa ashi.

Khristan yimsü ya lendong ka ama meayutsü ayongzükger. Khristan yimsü ajanga tamangba yimsü kecha anema menokdaker aser timi yimjung nung linür. Tamangba yimsü shiai pei lenmang agi Tsüngrem bushir. Nisung ka indang tamangba yimsü meyipzüktsü mesüra mezüngmeshitsü shinga dak-a temeten mali ta Lyngdoh-isa metetdaksü.

Paisa tamangba yimsü balala amangertem tsüngda kati ka akhümtsübuttsü aser loktiliba nung telongjem, yimjung aser temzüngi melaba ama alitsü ayongzükogo.

"Khristan yimsü ajanga tamangertem dang asen tsükchirtem-a meimtsü aser ozüng alema mapa meinyaktsü sayur. Asen tamangba ya telemsa adoktsü atema hadir ka ama mamshitsüla" ta Lyngdoh-isa ayongzük.

**OFFICE OF THE AO SENSO TELONGJEM DIMAPUR**  
 Dimapur - 797112 : Nagaland  
 Regd. No. H/RS-866 | dt. 24.07.2000  
 "Telongjem aser Terenlok"  
**SANGDONGER**

Ao Senso Telongjem Dimapur (ASTD) Lokti Inti mungdang 4<sup>th</sup> March 2026, 10:00 ako nung Senden Riju Kilem nung alitsü sangdonger. Anungji iba mungdang nung Ao senso züngsem ajak mapang shitak nung arua shilem tajung agitsü ASTD Mendenti nungi mepishia metetdaksür.

Sd/- Ningsangwaba Pongen  
 President, ASTD.  
 (8974052376)

Sd/- K. Tsukti Longchar  
 Gen. Secretary, ASTD.  
 (8837048239)

# Nagaland Civil Service Officers tem training tembangogo



**Dimapur, Tsüklai/February 28 (TYO):** Nagaland Civil Service Officers' tem atema Mid-Career Training sentong ka February 27 nü tembangogo.

Iba sentong ya Administrative Training Institute, Kohima nung agi, kong Additional Chief Secretary & Agriculture Production Commissioner and Director General, ATI V. Shashank Shekhar, IAS alaketa jaoker liasü.

Hopta ana agiba training sentong nung Sub-Divisional Officers aser Extra Assistant Commissioner tem densema ketdangsur metsüi shilem agia liasü.

Training nung tajangshiba indang jembiba mapang Officer Trainee temi training kanga takok ngua jangradema agiogo aser aika angazükogo, koba ajanga parnok pei mapa inyaksü asoshi tali temulung lemteta kümdaktsüogo aser tali bendanga agütsüshidaktsüogo, ta ashi.

Parnok indang group report

nung training nung shilem agiba ketdangsurtemi, parnok mapa inyakba tesem nung inyakyim balala indang metetdaksü, kong sorkar tenzükertem aser yimtsüng nung inyaktertem shilem aser khurettem indang capacity building aser training agütsütsü nungdakba, mapa ngua inyaksü atema lanurtem nem tasa balala agütsütsüba, education aser health amala sector tem ajungkettsü nungdakba aser sorkar welfare schemes tem tajungba metetdaksütsü aser benoka inyaksü nungdakba densema lir.

Alakteta jaoker ama o jembiba mapang V. Shashank Shekha, IAS-i, tebilemstütem benoktsüji temela saka tongtibangtibaji item tebilemstütem bentettsü atema inyakyimtem shidangtsübaji lir, ta ashi. Paisa, nisung ka taküm aliba nükjidongji lokti atema tajangzük agütsür kaka asütsüla aser tangar asoshi bendanga agütsütsü atema renema alitsüla, ta ashi.

Maneni Shashank-i, civil servants ka khuretji nüburtem ajangzükdaksütsü atema teletetba shitak aser jenjang shitak agütsüji asoshi lir, ta ashi. Alakteta jaokerisa, senotsü aser welfare sentong balala ya nüburtem ajangzükdaksütsü atema lir aser senotsütem ya timba district jenjang nungang benoka inyaksangshir, ta ashi. Anungji pai Officer Trainees tem dang, ochi mashi inyakyim aser tejak repranga inyaksangshiba nungi pila alitsü koda tongtibang iba indang lemsatepa liasü.

Training shibangba sentong ya Deputy Director, ATI Imlibenla Jamir lenisüba nung agi, Training dak sendakba nung osang tatsüka Deputy Secretary & Course Coordinator Asalie Lese-i agütsü. Sentong nung Director ATI Akunu S. Meyase, IAS, ATI ketdangsurtem aser staff tem aser EAC Probationer temi shilem agia liasü. Sentong ya mendenbubai tepela ojembiba sülen tembanga liasü.

# Chathe ayong nungi tasü mang ka nguteta lir

**Dimapur, Tsüklai/February 28 (TYO):** February 26 nü 1500 ako shi nung mejangjaba tebur tasü mang ka Chumoukedima nung Check Gate tejenba anasa Chathe ayong nung apongdaker lia ngutetogo. Tasü mang ya shiatoker liasü.

Osang angazükba sülen duty party iba tesemi ilonga ao aser tasü mang dak sendakba nung bushisüngdanga liasü. Temzüng ozüing dak ajemdaker tinyaktsü

maparen ajak tembanga inyakba sülen tasü mang ya PM examination/identification atema District Hospital Dimapur Morgue-i benerogo.

Ken o dak sendakba nung kinunger, adianu aser medemertem dang Officer-in-Charge, Chumoukedima Police Station (Mobile No.7085065161) den tongteprateptsü mepeshia metetdaksüogo.

# Tuensang nung Mini Legal Services Camp ka agiogo

**Dimapur, Tsüklai/February 28 (TYO):** Tuensang District Legal Services Authority (TDLSA) aser Tuensang District Administration na longjemer February 27 nü Noksen jila nung Mini Legal Services Camp ka ayongzüka agiogo. Iba camp yagi Noksen block kübok Noksen jila aser yimtsüng pongu ayimjema liasü.

Ayanga Chang, Panel Lawyer lenisüba nung sentong tatsüka agi aser Noksen Town Baptist Church Pastor W Lachumong-i Tsüngrem temaotsü meshizüka sarasadema liasü. Sentong nungsa NJS, Secretary TDLSA Kumdilong Kessen-i lokti pela agizükba o jembiba, Assistant Public Prosecutor, Tuensang Sonkang Himjai Chang-i awareness session tatsüka agi

aser Retainer Lawyer Smti. P. Herola-i tepela o jembiba liasü.

Iba sentong nung ajak senteper District nungi department ti-i shilem agia liasü.

Department shia nungi beneficiary tem yamai alitsü:

- Department of Social Welfare, Tuensang: 190
- Office of the Sub Divisional Officer, Noksen: 97
- Department of Agriculture, Tuensang: 21 + free seeds
- Medical department, Tuensang: 193 + free medicines
- Department of Horticulture: 24
- Food and Civil supply, Tuensang: 265
- Department of Economics and Statistics, Tuensang: 130
- Aadhaar correction: 70
- Tuensang DLSA: 210

# DGC Science Club-i ayonga 'National Science Day' mungogo

**Dimapur, Tsüklai/February 28 (TYO):** Dimapur Government College (DGC) Science Club-i ayongzüka February 28 nü Seminar Hall, DGC nung 'National Science Day' mungogo. Iba sentong ya IQAC, DGC-i senotsü teyari agüja munga liasü.

Dimapur Government College Science Club nung ya science department ajak densema lir.

Sentong nung o jembiba mapang Principal Dr. T. Tiakaba Jamir-i, iba sentong ya college puti otsüi aitsü, kechiyong Science Club-i ayongzükba sentong tulutibaji iba ya lir ta ashiba den iba club züngsemtem ya kanga tia taka kechiyong parnok ya science stream nung mezüngbuba batch lir ta ashi.

Paisa, Nobel laureate aser India nung physicist Sir C.V. Raman-i Raman effect ngutetba tenüng nung linük ajunga nung iba anogo ya

amunger ta ashi. Maneni paisa, tzü mopung dak sendakba ken o balala aser tzü mopung kümzüka ayutsü atema scientific community khuret indang lemsatep. Jamir-isa, kaketshirtem dang nükjidong tulu ayutsü aser temaba jenjang tongtettsü atema nendaka inyaksü ajungshi.

Sentong nung shisalen sayur Asst. Prof., Dept. of Comp. Sc Er. Modozho Mathew Dukru-i "Women in Science: Catalysing Viksit Bharat" onük nung ajemdaker o jembiba. Pai, 2047 küm tashi nungbo India ya developed linük ka kümdaktsütsü nükjidong aliba ataloktsü asoshi science nung tetsürtemi shilem agitsü nungdakba lemsatep.

Paisa, tetsür aser tebur tsüngda tawa aliba ya süngdaksütsü nungdakba lemsatep aser ashiba agi, teyari shitak dang agütsüra Nagaland nung aliba tetsürtemi

terenlok asoshi teyari tulu agütsütettsü. Pai, ajak liromedema aintsü aser linük yangertsü atema science luyim nung tetsürtem nem shilem agidaktsütsüji kanga tongtibang lir ta ashi.

Sentong ya Asst. Prof., Mathematics Dept, Dr. Temjennaro Jamir lenisüba nung agi aser B.Sc. 2nd Semester nungi Inika P. Chophy-i Tsüngrem temaotsü meshizüka sarasadema liasü. Sentong nungsa B.Sc. 2nd Semester nungi Secretary, Science Club Sumitra Sonar rapporteur liasü aser Asst. Prof., Chemistry Dept. aser Convener, Science Club Dr. H. Atoholi Sema-i tepela o jembiba.

Iba anogomung nungdem nung 'Science and technology for a sustainable future' omen dak ajemdaker February 27 nü 'Poster competition' ka agi. Takokertem nem kuli kakat tajung renemer agüja liasü.

# Rajiv Gandhi University nung International Seminar ka agi



**Dimapur, Tsüklai/February 28 (TYO):** Rajiv Gandhi University nung February 16 nungi 18 tashi 'Living World: Education of Past, Present and Future' omen nung ajemdaker anogo asem atema International Seminar ka ayongzüka agiogo.

Iba training sentong nung alima kübok tesem balala nungi academician, bushisüngdang aser policy yanglurtemi shilem agia liasü, shirnoki shisaluyim yimya melenshia aoba indang sensaksema liasü.

Seminar mapang technical session 16 nung research presentations 174 agütsü. Session tem ya Early Childhood Care aser Education (ECCE) to higher education amala onük dak ajemdaker agia liasü.

Panellists tem rongnung Jubilee Memorial College, Nagaland, Head Department of Economics aser Assistant Professor Dr. Chubaienla Imchen-a densema liasü, shibai "Rethinking Education and Employability in the Northeast Region: Special Reference to Nagaland" onük nung ajemdaker jembiba liasü.

Dr. Imchen-i, Northeast aser talisa Nagaland nung unemployment tali küma aoba tebilemstü indang lemsatepba mapang shisaluyim jenjangbo tajungba kümogo, saka iba ya

mapa angutsüsa masü ta ashi.

Laisa, sorkar mapa ishika dak tali metaloker aliba ajanga tetoktepba tali kümdaktsüogo ta ashiba den küm shia the labour market-i aiba lanurtem atema lenmang ya kanga temesü lir, ta ashi.

Tarutsü atema jembiba mapang lai school aser college jenjang nung tanur asü dang nungi career atema lenmang sayutsü, skill development aser entrepreneurship centre tem atsülangshitsü aser startup ecosystems tashi itshidaktsütsü ayongzüka liasü.

Maneni lai, sorkar mapa dang bushitsü tebilemba aliba ya melener skills, innovation, aser entrepreneurship ajungkettsü atema "workshop culture" dangi melena lanurtem mapa bushirtem masü saka mapa adokdaksürtem akümtsü ajungmesotsü ayongzüka liasü.

Iba amala tetushi international sabang ka nung Dr. Imchen-i shilem agiba ajanga, Jubilee Memorial College faculty züngsemtem local arrtsü adena oa national aser international jenjang nung riju tenüng nungi taliba shilem agiyonga aoba sayur. College-isa, faculty kati international jenjang nung shilem agitetba atema kanga nema danga bilemba lemsatepogo.



Dimapur nung alir Ao Officers aser Eastern Nagaland nungi Gazetted Officers telungjem senden sentong tajung ka IMC Hall, Dimapur nung February 27, 2026 nikongdang liogo. Iba sentong nung Rev. Dr.L. Kari Longchari Tsüngrem o jembiba aser Officers rongnung shisalemsatepba mapang liasü. Iba sentong nung agiba noksa ka yangi angur.

# PM Modi-i linük tesem ajaklen HPV vaccination drive tenzüksüogo



February 28, 2026 nü Ajmer nung Ato kilonser, Narendra Modi-i arrshi küm 14 tetsürtem atema Human Papillomavirus (HPV) Vaccination Programme tenzüksüba sülen tangokba noksa nung angur.

**New Delhi, February 28 (Agencies):** Honibarnü Ato kilonser Narendra Modi-i Rajasthan kübok Ajmer yimti nungi linük tesem ajaklen Human Papillomavirus (HPV) Vaccination Programme tenzüksüogo.

Tetsürtem rongnung cervical cancer nokdangtsü nükjidong nung iba vaccine ya arrshi küm 14 tetsürtem nem agütsütsü.

Vaccination drive tenzüksüba sülen lokti senden ka nung jembidang Ato kilonser Modi-i, NDA sorkari lenla ajaklen terenlok alitsü atema inyaker, aser tang HPV

vaccine tenzüksüba ya-a kuli rongnung ka lir, ta metetdaksü. "Ozü sorkari lenla ajaklen terenlok alitsü atema inyaker. Iba dak sendakba nung tanü Ajmer nungi onoki HPV vaccination campaign tenzüksüba den külemi terenlok project aika semzüksür/tenzüksür, iba denji külemi mapa nung shimba shidi lanurtem nem agütsür," ta paisa metetdaksü.

Human Papillomavirus (HPV) Vaccination kübok states aser union territories ajak nung arrshi küm 14 tetsür crore 1.15 shi nem iba vaccine agütsütsü. Iba vaccine ya

angati agütsütsü aser lemezükja aliba sorkari hospital tem nung agütsütsü.

Ayushman Arogya Mandirs (Primary health centres), community health centres, sub-district, district hospitals aser medical colleges nung iba vaccine agütsütsü.

India nung cervical cancer kanga putetba sülen tang iba vaccine agütsü tenzükter. India nung kanga bulua putetba cancer tashidak rongnung cervical cancer ya tanabuba jengang nung lir. Nisung lakh 1.20 dak cervical cancer putetogo aser 80,000 dak tali süogo (GLOBOCAN 2022 data).

# PELABA LEMSATEPER



(Aso: 29.11.1930- Asü: 26.02.2026)

**Lt. J. Imkong Amri (Changki)** kinüngtsü, MRS. BENDANGLA (BENDANGSANGLA) alima nungi pilar onok mangyimba mapang nung kinüngertem, medemertem, kiyongertem, Arogotem, associations aser temeimtem shirnokisa onok dang temeim sayua sarasadem den külemi nungdak balala agi onok nungita yariogo, kinüngertemi nenok ajak dang pelaba lemsateper.

Nenoki onok melung süngzüksüba, naro agütsüba aser yimya balala agi yariba ajanga onok nem tashi tasen agütsüogo.

Nenoki temeim sayuba aser yimya balala agi yariba atema nenok ajak dang kanga pelar. Ajak takoksang Tsüngremi nenok ajak moajang ta sarasademer.

- Chirnurtem, anükapang, semchirtem aser tanaben semchirtem.

# India-i Israel nung aliba senso-tem dang kümdanga alitsü tuyur

**New Delhi, Tsüklai/February 28 (Agencies):** Honibarnü US aser Israel nati senteper Iran nung yimti kar amakba sülen India-i Israel aser Iran naprongla nung aliba India nungterem dang kanga kümdanga alitsü metetdaksüogo.

Tel Aviv nung aliba Embassy of India-i Israel nung aliba India nungterem dang Israel ketdangsertem aser Home Front Command-i metetdaksüba tetuyubatem shidak beshitsüla, ta metetdaksü.

India nungterem dang 'designated shelters' nung jenoktsü aser pei kidang mesüra pei mapa inyakba tesem anasa lendong nungi kümzüksüba aliba tesemtem nung jenoktsü aser nungdak melira akokba tashi Israel-i maotsü metetdaksü.

Indian Embassy-isa sensotem dang osangtsüsang metetpelaa alitsü, ketdangsertem sangdong aser emergency osangtem metetpelaa alitsü metetdaksü.

Iba dak alia teyari nungdakba India nungterem den 24x7 emergency helpline-a lemsatepogo.

Indian embassy-i Israel ketdangsertem den maneni tongtepratepdar, aser tensa apir ano nungdak balala metetdaksütsü.

Ano külen Tehran nung aliba Indian Embassy-ia Iran nung aliba India nungterem dang kanga kümdanga alitsü, akokba tashi mesenzütsü aser kidang nungi mayazüksü metetdaksü.

Indian Embassy-i X ajanga, "Iran nung aliba India nungterem ajak dang kanga kümdanga alitsü, nungdak melira mesenzütsü aser akokba tashi kidang nungi mayazüksü metetdaksü. Iba dak alia Embassy of India den tongtepratepa alitsü metetdaksü," ta metetdaksü.

Honibarnü Israel-i Iran nung yimti kar amakba sülen Middle East nung tensa raksaogo aser region tesem ajaklen rara adoktsüsa tensa ka nung lir.

Israel-i Iran amak tenzükba sülen US Tir, Donald Trump-i, "United States-i Iran nung combat operations tenzükogo," ta metetdaksü.

Trump-isa, iba mission ya mission tajung ka lir aser nungdak, kechiyong Iran-i nuclear hadir aser

long-range missile systems yanglutsü atema inyaker, ta metetdaksü.

Trump-isa Iran nungterem dang yimsüsürtem atsüngdoktsü ayongzük.

Israel Defence Minister, Israel Katz-i, Israel anema amokmeren aliba agientsü atema Israel-i 'Operation Epic Fury' tenzükter ta metetdaksü.

Israel-i Iran amak tenzükba sülen Israel Home Front Command-i nüburtem dang 'bomb shelters' anasa alitsü aser akokba tashi mesenzütsü metetdaksüogo.

Yaküm June ita nunga Israel aser Iran na tsüngda anogo 12 tashi raaas liasü. Iba sülen United States aser Israel nati Iran nungterem hadir aser ballistic missile programmes amokmerena arur tang Israel-i Iran amaker.

United States aser Israel nati Tehran densema yimti ishika nung sorkar office aser sepaitem installations amak. Iba sülen Iran tongti lenir Ayatollah Ali Khamenei atsükadokogo ta osang angazükter.

Ano külen tanga osang ka nung, Air India aser IndiGo natia Middle East tensa nung ajemdaker Middle East nung aliba linüktemi aoba tayimtsü ajak thinenogo.

SpiceJet-ia, "Dubai nung airspace shibangba ajanga onok indang tayimtsü service kar anentsüa akok," ta metetdaksü.

Honibarnü India nungi Tel Aviv-i aoba Air India tayimtsü kabo len tom nungi meyipa arutsüsa aküm.

India-i dang masü saka Qatar densema linük aikati tayimtsü senzüba anenogo.

German airline Lufthansa-ia parnoki Tel Aviv, Beirut aser Amman tashi senzüba tayimtsü service ajak March 7 tashi thinener, ta metetdaksüogo.

Oman Air-ia Iran yimtiba, Baghdad tashi tayimtsü service anener, ta metetdaksü.

Flydubai otongdar kati, Iraq, Iran aser Israel airspace shibangba ajanga Honibarnü tayimtsü aika mesenzütet, ta metetdaksü.

Russia Transport Ministry-ia Israel aser Iran tashi senzüba tayimtsü thinener ta metetdaksü. Air France-ia Tel aser Beirut (Lebanon) tashi senzüba tayimtsü thinenogo.

# Andhra Pradesh nung factory arongba lendong nung nisung 20 asü



**New Delhi, February 28 (Agencies):** Andhra Pradesh nung Kakinada district kübok Vetlapalem nung firecrackers yangluba factory ka arongba lendong nung nisung 20 asü aser aika yiruogo, ta state Labour Minister Vamsetti Subhash-i metetdaksü.

Honibar nikongdang 2:00 ako meta iba lendong atalok, aser tapoktsü apokba olaji kilometer 5 pilar aliba tesemtem nungia angashia liasü.

Suryashri Fireworks unit ji Vetlapalem nung Godavari ayong anasa lir.

Iba unit nung firecrackers apokba ajanga anasa aliba kiojen nung kichiba-a raksa aser anasa aliba school ka kaksa, ta police-i metetdaksü.

Sepaitem aser police-i iba lendong nung yirur nisung 15 shi

hospital-i anir ao; parnok teimbaka tetsürtem liasü.

Iba osang angashiba sülen District Collector, Superintendent of Police aser tongti ketdangsertem iba tesem jagi oa kümzükba aser teyari agütsüba maparen nung yaritep.

Iba unit nung inyakerem tasü mang karbo shilem aika küma poksar prokshia liasü.

Andhra Pradesh chief minister N Chandrababu Naidu-i iba tatalokba atema tejashi lemsatepba den külemi ketdangsertem dang akokba tashi

takoksa angurtem nem teyari agüjang, ta tuyu.

Chief Minister-i Home Minister V. Anitha danga iba tesem jagi oa maparen ajak ketdangtsü tuyua liasü.

Deputy Chief Minister Pawan Kalyan-ia iba lendong nung nisung aika asüba atema mangyim jashi lemsatepba den külemi takoksa angurtem dang sorkari akokba tashi teyari agütsütsü, ta metetdaksü.

Deputy CM-isa District Collector aser SP na den iba osang metetpela.

## - ALI AYOKER -

\* Prime land for Urgent Sale ! \* Naga united village  
 \* 70,000 sq. ft. \* Plain stable high land  
 With concrete boundary walls and natural drainage.  
 \* Near the main road \* Any plot size available  
 @ 430/- sq. ft (Negotiable & No broker)  
 Contact : 7628822085 / 9366156425



## TIR YIMYIM YIMOBILEM (EDITRIAL)

DIMAPUR SUNDAY, FEBRUARY (METSUREMI) 01, 2026

### Süngyanglu ajungdokba

**T**enyar Paul aliba lima nung alirtemji süngyanglu külemertem liasü. Aji oda, Efesa nungertemi kanga tushia külemba süngyanglu tsüngremji Diana liasü. Ibaji tobur tajung tetsür süngyanglu ka liasü. Parnoki iba süngyanglu tsüngremji tuluka yanglur tenla ki tajung ka nung ayu aser ibaji alima nung tesüngmangtsütem rongnung ka ta parnoki züngshi. Aji oda, Efesa nungertem ajakji süngyanglu külemer asünungji par lima nung süngyanglu yanglua ayokertemji kanga tajanzük ngua liasü. Iba ama mapang ka nung tenyar Paul Efesa limai arur amangba purtem ajurua parnok nem tanüla temeshi agizükdaktsü aser mangmangba purtem den Tsüngremi yimli indang jembia liasü. Atangji, Paul-i Efesa tonga marudangyongi yangji alirtem tia indang meteta dang liasü, saka pai Efesa nungertemi süngyanglu külemba anema mejembi mesüra maitsü aser matala, ajisüaka yangji orr nübortem dang Yisu Khrista temeim osang tajung indang sangdonga jajaba mapang nübortem aikati Yisu Khrista dak amang aser süngyanglu külemertem ajema aküm. Aji oda, Yisu Khrista dak amangertem o süngyanglu külemertem libaliro naji tema nungia reprangteta kenyongi balaka melenshia adok. Aji oda, kadang nübortemi pei kidang süngyanglu yur külemba anen, süngyanglu yanglua ayokertem mapa nung takoksa alutsü tenzük, kechiyong parnok dang nungi süngyanglu alirtem kanga ajema kümamadok. Aji oda, süngyanglu ayokba ajanga takar akümertemi Tsüngrem temeim mangatet aser parnoki Yisu Khrista osang tajung magizüktet. Tanü asenok lima aser nübortema Paul mapang Efesa nungertem amaji aika lir. Atangji, Efesa nung amaji asenoki hon aser taribi agi yangluba süngyanglu mekülemi alitsüa akok, saka asenoki Tsüngrem dang nungi taoba senotsü bilemer, ali kimong meimer, süoshi aser chiyongtsü penbur, alima tsütsü nungtugu akümstsü tokteper. Yisu Khristaji kibur ta agizüka amangra, asenoki itemji meinyaktettsü aser ochimashi mapatem meinyaktettsü ta asenoki meteta lir, iba jagi asenoki item süngyanglutemji meindoktetter. Asenok taküm ya Paul mapang Tenyar mapa 19 nung shia aliba taribi atsünger Demetria, shibai pa tajanzük anguba lenmang meshibangnüba agi nübortem dang Pauli sayutsüngiba anema nokdaktsü ayongzük, pajiang mesük. Yi shibangba agi sen lenmang shibanger ta asenoki jembir, Sali moko meyokra asenok kibong memesütettsü amai asenoki bilemer, ochishia lira sen mauyatettsü tsübur, yimjung nung lira tashiyim agi rakzükratek mesütettsü ta shisabolur. Item süngyanglutem asen mulungjang nungi majungdoktetba ajanga asenok taküm, kibong aser alima kangshir. Tanü tensa Khristan-tem asoshi itemji tamang tongpang asütsü. Iba ama tensa mapang ka nung, Paul ama asenoka tasü itta nokdatsüsa asenok nema tashi agüja lir aser lenitsü atema tanüla temeshi yoka lir. Paul taküm ama asenoki tangar aija inyaksü menüngdaker saka asen taküm aser jakla yimya agi tangar taküma dena melenshitsuasa asenok alitsüla aser jembitsüla. Efesa nung Demetria aniba telok amaji asenok rongnunga süngyanglu meindoknertem alitsüa akok mesüra asenok anema nokdaker adoktsüa akok, saka asenok taküm nung Yisu Khrista jakla aser tanüla temeshi aliba jagi tangar mulungjang nunga mapa inyaksü.

## OLEMSABANG

### RSS inyakyim aser Impur Mission wadang

P. Renthly Jamir

*(Yashi adok nungi...)*

Tang India lima ajak RSS kabu nung lirparnoki sen crore jenti entoka nüburtem mesüzüker. School a lapoktsür. Missionary Rev Asenjungba Imsongi ashiba agi Nagaland nunga Zeme kinteküpok tia nung alir tem tesem kong sa lir yangji school lapokja par yimsüsayur aser aji shitak tanguba tejangja tenük kuli lir.

**IMPUR MISSION WADANG** - Dr. Clarki kechiba Impur ta aja, Yisu maru tashi amshitsü pai tapi agi Impur ta maja. Aor sobaliba nung yim ajak nung Impur chanuji akhüm ketta ajir yimeri dang masü kishikinar bendangeriamera keta parnok taso talir ta jembir. Anungji Impur chanu "MESHIMETSÜI MAOR" saka kadang parnok tali meshi lidir Tsüngremi atakatemer asermatem agi tempanga somatangaaa aor parnok dang ji Impumah ta ajar item ji kodanga tanaben temoatsü dangi meyipba marutsü. Anungji Dr. Clarki Impurta ajaba ya Tsüngremi jadaktsüba nungja lir. Meshimetsüi maotsü. Aor atemalmpurji angati taneptsü angudak Yordan ayong lir. Kibuba takum ali tashitanepsüba taah kecha magitsü aneptsür tesünep nung oang ta ashitsü. Dr. Rev I Ben wati-i kechiba kü tasü mangbo Impur nung remjang ta shia yakta yongiyangji aremstsü temelaba agia ayu. Pa dang masü ano tamalen Impur School Headmaster Zeliang nung kozomero Shiba Impur atema bendanga agütsübataküm ka liasü, pa Impur nung asüba tasü mang par limai bener moteti Impurnung rema toktsü. Küm ishika tejaklen par kinunger teretji kakteta bener aotsüaru saka teretjagi nibo Impur nungsa alitsü tasür bener modaktsü. Teret kakteter enokba gari tasen sür nung start madok lenmang nokdanga tsüngluarua anentsü alu. Anungji kinungertemi pai Impur nungang teretji yudaktsünürta apiteta toktsür aoba otsü asenoki angashiogo. Kechiyong parnok tamangtirteimlaji

Kodang tasü mapang kü dak atonger,

Ni shia arutsü aji ni metet,

Idangji Yisu den teti alitsü.

I. Ben Wati aser Kozomero nung ama aika Impur leper nung mejanga lir aser Kibuba Yisu mepet nung arudang parnok Impur nungi saaktsü kodangratemstsü alitsü ta bilemer. Impur Mission Centerji oang aser alima kin ajak nütsüng kümdakjang ta Aor asoshi Yisu kulisür tenyartem takümbendanga renemshir apusodak Yirusalem lir. Mission tetezü yokba saka alima kin ajakjibo yutsür India tesem mashi ka nung oa baptitsütsü lenmangmesümesüa kümogo. Linük nütsüngzüng CAA nungi SIR tashi nung Hindu kwi tangar kwi ajak züngdangteter yua lir. Asen kidangsür Karbianglong tashinung Hindu nübu Lakh 7.6 ? 80 % tanüngbaji tangar ajak meyokteper lir. India rangben nung RSS tashi alema, tongtibangsa Muslim aser Khristan arazüktsümakok kümogo. Tang Nagaland nung Khristan 87.93%, Hindu 8.75% tanüngbaji tangar lir. Yamaji Hindu nütsüng aika meliaka RSS aser BJP telokimapa tulu inyaker asünung Impur tenüng nunga sen Crore aika agütsüba India Parliament nung tabled süa lir ta jembir, ya shitak asünungbo Impur Mission Center ta ajabaji ayatzüra maremba meshimetsür lima ta ajatsü. Aji dang masüano Hero worship playground nungja atemer state government dang meshimetsübajia Mission mapa den mapet. Kechiyong Mission wadangkakjibo meshimetsüba masü AGÜTSÜBA ta ashir. The success of the Churchjibo give, agütsüba. Tang India tesem ajaklen Khristanemreshikangshia makyonga aruba RSS tashi tulu denji tsükteptsü (Confront). Impur Mission wadang tebilemstsü tulu lir, süra parnok dang meshimetsüaparnok tashi nokdangtettsü no ta shisadangtsü mapang tongja tongogo ta bilema akidang Rev Kijung aser Semsalepzüng Mokochung SDO-i Tzülaatena sayutsüngi aoba atema merenshia senchi sen 50 chir nüktzü yimalmpuri aludang (08-06-1939) Missionary Andersoni tejashi sünepja ka nem pa sü kombol apenloktsü ka nem pa tola Coat semoktsü aser juli nungi sen 50 ji agiteter agüja mapa inyakba tanü Impur Mission wadang den medemdanger.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## 'Christians in Sport' ministry tenzükba sülen küm 50 jungogo



Christians in Sports ministry nung mezüing director Rev. Andrew Wingfield Digby (ajichilen mezüingbuba) noksa nung angur.

**February 28, 2026:** UK nung aliba Khristan ministry 'Christians in Sport' ajanga saisapongertem den Yisu Khrista osangtajung lemsatepa aruba sülen küm 50 ajungba mong mongogo.

1976 küm February 18 nü saisapong jangrar Khristantem kari, asenoki dang sarasademra Tsüngremi saisapongtem rongnung mapa tulu inyaksü ta apiteta liasü.

Mezüing iba ministry tenzükba mapang nung BBC tennis commentator Gerald Williams, Rev. Alan Godson, America nunger sayutsüingir Eddie Waxer, Wimbledon champion Stan Smith aser business inyaker Kenneth Frampton nunger liasü. Parnoki saisapongba moaputem aser club houses nung evangelistic outreach ajanga Khristantem longjemtsü atema network ka tenzüksü bangjema iba ministry tenzük.

Iba telok jagi nükjidong pongu atema sarasademtsü teletetba agia liasü. Iba sülen March ita nung tebur 18-20 shi adenshia senden amen aser kasa küm nungjisa June ita nung London

nung ayongzükba sentong ka nung nisung 120 shi aden.

Ajioda saisapongertem rongnung Khrista osangtajung proktsü atema England nung parnok aika longjema liasü.

1976 küm nungjisa küm tatembanglen tashi nungbo north England aser south England naprongla nung fellowship groups tentettsü bangjem.

Tesüsa parnoki Khristan saisapongertem atema fellowship tenzükba tsütsü Europe nung aliba linüktem atema England ya tishitsü linük ka asütsü parnok sarasadema liasü.

1976 küm June 20 nü London nung Wimbledon tournament tenzüksü anogo ka jelia Park Lane Hotel nung saisapong Khristan 80 adenshia sentong ka agi, iba sülen 1977 küm June 18 nü tanabuba sentong agi aser 1978 küm ayongzükba sentong nungjibo nisung 400 shi aden. Iba mapang tashi nungjibo Christians in Sports ministry ya junga tenteter liasü aser 1980 küm registered charity ka aküm aser mezüingbuba toklang director ji Rev. Andrew Wingfield Digby liasü.

Tanübo iba ministry ajanga saisaponger Khristan 10,000 dak tali nungita yarir aser saisaponger lenir 1,000 nem training agütsüogo. Parnoki universities campus tem nung sports camps aser outreach sentongtem-a ayongzükba agir.

Christians in Sport-isa linük 150 nung indigenous sports ministries den partnership yangluogo.

Iba ministry küm 50 ajungba nungtem nung ministry general director Graham Daniels-i video ka ajanga tereprangertem dang, "Saisapong ya universal oshi ka lir, aser Tsüngremi iba tiyongtsü nung nisung aika amshia Tsüngremer mission field ka kümogo," ta metetdaksü.

Daniels ya Cambridge United Football Club nunga director aser Cambridge nung aliba St Andrew the Great Arogo nunga associate staff züingsem ka lir.

"Tsüngremi mapa tulu inyakogo, aser iba atemaji onoki Pa nem tenüngsang agütsür. Saisapong luyim nung Tsüngremi maneni mapa inyaksü atema sarasademjang," ta paisa metetdaksü.

## South Sudan nung pastor Lino Pasquale puer aoba sülen khaset

**February 28, 2026:** February 19 nü South Sudan nung pastor ka puer aoba sülen February 25 nü pa tasü mang angu, ta par kinünger kati metetdaksü.

Hai Baraka Pentecost Arogo nung pastor, Lino Pasquale February 19 nü Gondokoro ayong nung angu apui aoba sülen sama, aser pa tasü mangji hopta ka shi lir ang angu.

February 25 nü Sudan Pentecostal Church (SPC) nung lenir kati, mejangjaba nisung kari Pastor Pasquale dak tenük yoka liasü aser mejangjaba nisung kati pa khaset," ta metetdaksü.

Arogo nung züingsemtem aser kinüngertemi anogo aika pa bushiba sülen Bodhbar

anepdang pa tasü mang angu, ta Arogoi metetdaksü.

Pentecost Arogo Juba Area Board nung züingsem kati, "Iba ama tasü mait mapa ajanga Arogo züingsemtem kanga aoksar, jashir aser mangyimer. Onoki iba ya sashia aitsür," ta ashi.

Parnokisa South Sudan sorkar aser security agencies ajak dang tangsa iba tatalokba ya jungjunga bushisüngdangtsüla, ta takhangba agütsü.

"Iba ama tatalokba ya Tsüngrem tsüngdang temenen lir aser meimchirtem ozüing kübok tagizüktettsüla masü," ta Arogoi metetdaksü.

"Item ama ozüing alema

inyakba ya menokdangtetra ibaji ajanga asen lima nung aser nüburtem rongnung tesü nep aser ochi temeden malitsü," ta Arogoisa metetdaksü.

February 25 nü Arogo nung züingsemtem adenshia pastor atema mangyimogo.

Pastor Lino Pasquale ya Tsüngremer tenyar ka liasü aser osangtajung proktsü atema bendanga agütsüba lenir ka liasü, ta Arogo nung lenirtemi metetdaksü.

Taküm January 14 nü Africa Inland Church (AIC) nung pastor, Rev. Christopher Maring khaseta liasü. January 14 aonung 7:30 ako meta Pastor Maring par kidang lia mejangjaaba nisung kari pa khaset.

## ANOGO ABEN TSÜNGREM DEN

## KODANG TSÜNGREMI 'MA' TA SHIDIR!

*Kechiyong nenok asoshi kü sentong ni meteta lir, oda tamajung asoshi masü, tesülen nenok nem teimla agütsütsü, yimjung indang tebilemba ta Kibubai ashir." Yer. 29:11*

'Ma'mesüra 'nung' ta asüba ya o tamajung ama bilemer.

Saka item oji taküm nung tenüngdaksü tongtibang otem ir. Talisa tsüraburi kodang 'ma' 'nung' ta ashir aji kechiba ashir-artsürabur kadi meteta lir, kechiaser pei chinur meimba agi ma/nung ta ashitsüsa akümer. Parnok lendongi maitsü soshi mes?ra meyirutsü asoshi tsüraburi aiben ma/nung ta ashitsüsa akümer. Item oji tanürtemi manganüba otem lir saka iba jagi parnok timtem aser lendong aika nungi kümz?ka anir arur ta angateter.

Tsüngremia asenok dang khenkhen ma/nung ta ashir. Asenoki teti Tsüngremi hai-hai dang ashitsü imlar, saka Tsüngremer 'hai' dang nungi Tsüngremer 'ma' jiang asen asoshi khenkhenbo tenüngdakba akümer. Saka ya angatettsü merangdi, kodang Tsüngremi 'ma' ta ashir Pai asenok asoshi ano tanga tajungba ka bilemdar ta metetdi. Kechiaser Yeremia 29:11 nungji ashir "tesülen nenok nem teimla agütsütsü atema" ta shia lir. Tsüngremer 'ma' nükjidongji teti tajung asoshi alir ta metetdi.

Tsüngremi ne dang tangya ma/nung ta ashiba mapang ka asü? Nai mejashi-i Kibuba dang imla ataliangma, nai Kodanga mesasatsü.

## SARASADEM:

Kibuba Yisu ni ne dak amangdi, nai kechi langzüdir ajak ni ajungts? atema ta ni angazükdaksü nung pelar. Amen.

## Easter Sunday nü Tenla ki amakba ken o nung Suresh Sallay puogo



Major General Suresh Sallay

**February 28, 2026:** 2019 küm Sri Lanka nung Easter Sunday anogo nung Islamic kiralongrartem den senteper bomb amshia Tenla ki asem den hotel aika amakba ken o dak sendakba nung taoba mapang Sri Lanka State Intelligence Services (SIS) nung tongti, Maj Gen Suresh Sallay puogo.

2019 küm atalokba lendong nungji nisung 279 asü aser nisung 500 dak tali yirua liasü.

2019 küm Maj Gen Suresh Sallay ya Brigadier dang liasü aser security forces nung züingsem ka liasü. Pa teinyaksü mapaji kiralongra nokdangtsü atema liasü.

Ajisüaka kiralongrartem den amalitepa inyakba atema pa nem tai tonglokja puogo.

Sallay ya Muslim nunger masü, ajisüaka Islamic kiralongrartem senden nung pa-a aden, ta pa dak melung malemer.

Election atongtsü mapang

anasa tensa raksadaksütsü aser ibaji ajanga taoba mapang Sri Lanka Tir, Gotabaya Rajapaksa jenjang tajungba kümdaksütsü nükjidong nung kiralongrartemi amak ta bilemer.

2019 küm bomb amshia amakba sülen anogo ishika lir Rajapaksa-i pai election nung tokteptsü sangdonga liasü aser pai election nung takok anguba sülen Sallay nem Sri Lanka State Intelligence Services (SIS) tongti menden agüja liasü.

Deputy inspector general of police, Sajeewa Medawatte-i, Sallay nem tai tonglokja ya mapang talangka agia bushisüngdangtsü, ta metetdaksü.

Osangbener den jembidang Catholic Arogo nung otongdar, putir Cyril Gamini Fernando-i, "Easter Sunday nü amakba dak sendakba atangji kuliji onoki metettsü nungdak. Takoksa angur ajak nem ochi temeden agütsütsüla," ta metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG



Tzüwang

(n) tzü talila atua ayimba (rising water)

\* Tzünglu aruba mapang ayong nung tzüwang adoka ayimer.

Tzüyim

(n) ayong balala nungi ajurutepa yim amato küma aliba tzü tulu (sea)

\* Tzüyim nung khu abenba rong tulu senzür.

OLONG PAITEP # 7429

15x15 crossword grid with numbers 1-16 indicating starting positions.

TIPIEN

- 1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T \_\_\_ lu - (3)
10. Takdang temalen - (9)
11. Tesa \_\_\_ a - (3)
13. Ajungbena temulungjang tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

- 1. Reprangdaksü - (4)
2. \_\_\_ ur - (3)
4. Kiojen yangludak - (6)
6. \_\_\_ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemtdak - (6)
12. \_\_\_ adenshi - (4)
14. Tsünüsenbongtsü adokdak - (3)

OLONG PAITEP # 7428 TELANGZÜBA

TIPIEN :

- 2. Tatidang, 6. Angatet, 9. Aket, 11. Teimsür, 13. Rara, 14. Mepishi, 17. Mangdang.

LANGTSÜNGLEN :

- 1. Ente, 3. Tapet, 4. Ain, 5. Taküm, 7. Asür, 8. Tarak, 10. Teki, 12. Raksa, 15. Ents, 16. Hon.

NAI-A YA METETTER



Pune nung Chrysalis Entrepreneur Forum ajanga alima nung 'largest box cricket tournament' tulutiba ayongzükba asoshi Guinness World Record ka nguogo. Iba Forum-i Bavdhan, Pune nung February 3, 2026 nungi tenzuka anogo 13 tashi Chrysalis SME League ta ser asayamung ayongzuka asaya. Idangji nisung 726 adenba telok 66-i 135 matches asaya liasü aser Guinness World Records adjudicator Pravin Patel-i official certificate agütsü.

Iba asayamung nung industry 30 tema nungi telok 75-i shilem agia liasü.

Anini mini stadium football-i FIFA quality certification angu



Itanagar, February 28, 2026

(Agencies): Dibang Valley district kübok Anini Mini Stadium nung football ground-i FIFA Quality Field Testing nung takok nguogo.

Iba ajanga international recognition nguogo aser Arunachal Pradesh nung sports infrastructure renlokba kuli jangjatsür.

Chief Minister Pema Khandu-i iba osang metetdaksü aser Anini o Dibang Valley nung alir nem

tenüngsang agütsüogo.

"Iba FIFA certification ajanga state nung sporting facilities tajungba akümba sayur" ta pai ashi.

FIFA indang international standards atongba ajanga lanur footballers asoshi maongka tulutem angutsü aser sporting excellence anitetsü ta CM Khandu-i metetdaksü.

FIFA field certificate ajanga ashiba agi Anini Mini Stadium

nung enoka aliba football turf system ji "FIFA Quality Programme for Football Turf - FIFA Quality" standard kübok züngsemer.

CM Khandu-isa iba mapatong takok ngua inyakba department tem, agencies aser kijatem nem tenüngsang agütsüogo.

FIFA certification ajanga Dibang Valley nung football ajungkettsü aser lanurtem ajungmesotsü imlar.

Mizoram-i ILP malir non-tribals 1,177 meyipa yokogo

Aizawl, February 28, 2026

(Agencies): Tesüiba küm ana tsüngda Mizoram nungi non-tribal nisung 1,177 tashi Inner Line Permit (ILP) alema inyaksangshiba atema meyipa yokogo ta years, State Home Minister K Sapdanga-i metetdaksü.

Congress MLA C Ngunlianchnunga-i Assembly nung iba dak sendakba asüngdangdang "2024 aser 2025 tsüngda Mizoram nung ILPs 3.39 lakh agütsü. Iba nungi 3,17,807 tashi temporary permits aser 22,185 regular ILPs liasü"

ta Sapdanga-i langzü.

2024 nung ILPs 1,59,608 aser 2025 nung 1,80,384 agütsü. Kolasib district nung ILPs 1,90,528 teimtiba agütsü, iba sülen Aizawl district nung 1,23,063 agüja liasü.

Küm ana tsüngda ILPs agütsüba nung state sorkari Rs 15.12 crore revenue angu ta home minister Sapdanga-isa ashi.

Külen, Mizoram nung kaketshir telok tulutiba Mizo Zirlai Pawl (MZP)-i tang beshiba ILP framework ajunga melenshitsü atema

ayongzükogo.

Mizoram-i non-locals aika "self-sponsorship" mesüra tanga non-local entities-i sponsorship ajanga aiter, ta MZP-i ashi.

State sorkari 2016 aser 2017 nung sangdong ana agütsüba meyipa agitsüla kechiyong item ajanga non-tribal trade licence holders-i self-sponsors ama inyakteter aser managers mesüra labourers 5 tashi sponsor süteter. Iba inyakyim ajanga ILP system tashimait kümdaktsür aser Mizo nunger asoshi lendong bentsür arutsü ta MZP-isa metetdaksüogo.

Imphal Airport nung CISF-i heroin seret 4.8 apu

Imphal, February 28, 2026

(Agencies): Central Industrial Security Force (CISF)-i Bir Tikendrajit International Airport, Imphal nung February 27 anüngdang nisung ana ket nung heroin seret 4.8 bena aliba puogo.

Nisung ana ya non-locals lir aser Guwahati-i aotsü aliba Air India Express (IX 1038) tayimtsü

nung amentsü lia apu.

Tena ya Kanhiyalal Prajapat'er jabaso Suresh aser Rajendra Singh'er jabaso Vijay Singh na ta jangaoggo. Tenaprong Madhya Pradesh nungi lir.

Tayimtsü anendak CISF personnel-i random frisking aser checking exercise nung tena mita reprang. Idangji tena ket

nungi heroin powder seret 4.800 bena aliba apu.

Tenaprong den külemi heroin ji Narcotics Control Bureau (NCB) ket nung agütsüogo aser parnoki ozüng dak sendakba maparen inyaktsü.

Tenati heroin ya kong nungi angu metettsü atema bushisüngdang südar ta ketdangsurtemi ashi.



Meghalaya nung 6th India-Japan Intellectual Conclave, KIZUNA-6: Scaling up Partnerships tenzükdang agiba noksa ka angur. Anogo ananü sentong ya Asian Confluence-i Ministry of External Affairs, Embassy of Japan, Meghalaya sorkar aser Sasakawa Peace Foundation nunger den yaritepa ayongzükur.

# Israel aser US nati Iran amak tenzükogo



**Washington, Tsüklai/February 28 (Agencies):** United States aser Israel nati Honibarnü Iran kübok tesem balala makogo. Tir Donald Trump-i ashiba agi, iba ajanga United States amokmerenba tembangdaksütsü aser Iran nungertem nem parnok yimsüsürtem atsüngtoktsü atema maongka agütsütsü.

Kasa mapang nung Iran-ia Israel dak missile khaloktsüogo, ta Israel military-i ashia aser Pentagon-i ashiba agi, US-i Iran amakba nungja ya "OPERATION EPIC FURY" agütsüogo. Trump-isa, Iran nungertem dang tejenok dak bushia aotsü mepeshia metetdaksüogo, kechiyong parnoki ajaklen bomb tsükdaksütsü ta ashia. Pai, "onoki onok mapa tembanga inyakba sülen ner sorkar

atsügang. Iba ya putu aika atema nenok asoshi tatembangbuba maongka asütsü akok," ta ashia.

U.S. military-i Iran nung tesem aika amaksü sentong lir ta U.S. ketdangsür anati Reuters dang ashia.

Kasa mapang nung telangzüba tesashi agütsütsü atema Iran-a renemdar, ta Iran nung ketdangsür kati Reuters dang ashia.

Tehran nem nuclear atema sensaksem nung hai haura kadaksütsü atema Trump-i middle east nung U.S. nung sepaitem aika anidenogo. Pai ashiba agi, US-i Islamic Republic anema operation tulu ka tenzükogo aser Tehran nem nuclear hadir meyangludaksütsü ta shiogo.

Trump-isa, Iran-i long-range

missiles tem yangludar aser iba ajanga US amokmerener ta shia missile industry ya awi küma rongtoktsütsü ta ashia.

"Onok nükjidongji amokmerentem aginja America nungertem Iran yimsüsürtem nungi kümzüka ayutsü atema lir," ta pai ashia.

Israel Ato Kiloner Benjamin Netanyahu-ia, US aser Israel na senteper Iran amakba ajanga tasüta Iran nungertem nem parnok tarutsü yanglutsü atema maongka agütsütsü, ta ashia.

Source kati Reuters dang ashiba agi, Iran lenir Ayatollah Ali Khamenei ya Tehran nungi anina tanga tesem ka nung jenoka tokja lir.

Israel aser Iran na taoba küm June ita anogo 12 raratepba sülen tang ano linük ana yagi Iran amak tenzükogo.

# Pakistan-i Afghanistan den sensak asemtsü memulunger

**Islamabad, Tsüklai/February 28 (Agencies):** Pakistan aser Afghanistan na anogo asembuba atonga arrtsü adena raratepba mapang linük aser lokti tentet balalai yimjung atema sensaksemtsü asoshi ayongzüka arudar.

European Union indang foreign policy tekolakba Kaja Kallas-i Honibarnü linük anaprongla dang azüzükteptsü aser yimjung atema sensaksemtsü ayongzükogo aser ashiba agi, iba ajanga parnok meketa aliba tesemtem nunga mepetmesü adokyonga aotsü akok ta tekümdangtsü metetdaksüogo.

Iran, Jordan, United Arab Emirates aser Russia nung den UN Secretary-General Antonio Guterres-a rara anentsü atema yimjung atema sensaksemtsü ayongzükogo.

Afghanistan nung Taliban yimsüsürtemi iba mangatetep bentetsü atema sensaksemtsü asoshi parok renema lir ta shiogo. Ajisüaka Pakistan-i Honibarnü sensaksem kecha magitsü, ta shiogo aser Afghanistan dang par litsü nung kiralongrartem amenoker inyaksangshidaksüba anentsü maneni takhangba agütsüogo. Afghanistan nung kiralongrartem amenoker inyaksangshidaksür ta shia parnok aitsüba ya Kabul-i magizüki arudar.

"Sensaksem kecha magitsü. Afghanistan nungi kiralongraba maparen ya anendaksütsüla," ta foreign media atema Pakistan Ato Kiloner indang otongdar Mosharraf Zaidi-i Pakistan TV dang ashiba den, Pakistan sorkar tinyaktsü tongtibangtibaji lisopurtem aser litsü kümzüka ayutsü asoshi lir, ta nenshia metetdaksü.

Kasa mapang nung mepetmesü adoker aliba arrtsü nung linük anapronglai mangyangtepa kati ka maktepa arudar.

Afghan media sangdong balala ajanga ashiba agi, Taliban sepaitem arrtsü nung aliba Miranshah aser Spinwam tesem nung amendaker aliba Pakistan nung military camp tem drone amshia maka liasü.

Pakistan indang Dawn osang kakat sangdong ka ajanga ashiba agi, drone amshia Bannu yimti nung mosque ka amakba sülen nisung pongu yiruogo. Pakistan TV-i ashiba agi, Pakistan nung sepaitemi Afghan Taliban pur amendaker aliba tesem balala parnoki makogo.

Pakistan-i taoba hopta anüing ajanga Afghanistan nung telungpurtem dak rangloker tesem balala amakba sülen Afghanistan-ia Brehostibarnü Pakistan kübok district trok nung tesem balala maka liasü.

Iba atema telangzüba agüja Pakistan-ia Hokolbar anepdang anüing ajanga Afghanistan yimti aser Kandahar aser Paktia kübok tesem balala maka liasü. Taliban puri 2021 küm civilian sorkar atsüngtoka sorkar kümtetba sülen tang



**Kaja Kallas**

mezüngbuba Pakistan-i south len power base makogo.

Linük anapronglai iba rara nung takoksa tulu ajangshiba osang agütsüogo. Pakistan-i ashiba agi, parnok sepaitem 12 aser Taliban nung sepaitem 274 tepsetogo. Kasa mapang nung Taliban-i ashiba agi parnok sepaitem 13 süogo aser Pakistan nung sepaitem 55 süogo. Ajisüaka linük anapronglai osang agütsüba ya mejangja.

United States, shirnoki Pakistan ya non-NATO ally tongtibang rongnung ka ta züngshir, parnoki Taliban-i Pakistan amakba nokdangtsü asoshi parnok temeden lir ta shiogo.

Pakistan nung tawa Afghanistan nung amendaker aliba telungpur teloktemi tesem balala maka arudar, kong linük yimti nung mosque ka pei temang nung bomb alenoker pokdaksür kati maka nisung aika teseptetba densema security force tem amendaker aliba tesem balala nung amakba densema lir.

Pakistan nung ketdangsürtemi item tesem balala amakba ya Pakistan Taliban, shirnok dang TTP ta ajar parnok dak tai tongloktsüogo aser Afghanistan telung nung iba amala kiralongrar telok amendaker inyaksangshidaksüba atema Afghanistan aitsüogo.

Ajisüaka Kabul-i ashiba agi, parnoki Pakistan amaksü atema par litsü shinga nema mamshidaksü aser Pakistan nung tatalokbatem ya parnok telung ken o lir ta shia arudar.

Pakistan ket nung nuclear hadir lir aser parnok indang military tashi ya Afghanistan dang nungi kanga agi tashi taitba lir, ajisüaka Taliban pur ya mapang talangka United States-i aniba sepaitem den rara arur asünung parnok rara nung tasa kanga tajung aser parnok tajangshiba aika lir.

Pakistan aser Afghanistan na taoba küma kanga sashia raratepogo aser alima kintem teyongtsüi aiba sülen ceasefire ka benoker liasü, ajisüaka tang Afghanistan nungi kiralongrartem Pakistan amakba ajanga rara tenzükshio.

MINISTRY OF MICRO, SMALL & MEDIUM ENTERPRISES  
GOVERNMENT OF INDIA

COIR BOARD

## Engagement of Project / Technical Staff on Contract Basis

Ministry of MSME, Government of India kübok statutory body Coir Board-i, engagement of Project/Technical Staff (7 positions) atema temsüa aliba candidate tem apply asütsü jaokogo. Iba ya parnok indang research institutes ana: Central Coir Research Institute, Alappuzha, Kerala and Central Institute of Coir Technology, Bengaluru, Karnataka atema contractual basis nung asütsü.

Applicants temi advertisement dak sendakba nung osang tejangjaba agitsü atema Coir Board's website ([www.coirboard.gov.in](http://www.coirboard.gov.in)) semdangtetsü. Application ya online ajanga 2026 küm March 22 nü 5:30 ako tashi nungbo benoktsüla.

Scan QR code for website

**17.02.2026**

cbc25131/12/0048/2526

S/d  
**SECRETARY, Coir Board**

**AYOKTSÜ METETDAKSÜR**

**SPLSD Asset Recovery Management Branch (D.P. 7259), 2nd Floor, Dee Bee Grande, 6 Mile, Panjabari Road, Guwahati-781022, Email: cb7259@canarabank.com**

**SECURITISATION AND RECONSTRUCTION OF FINANCIAL ASSETS AND ENFORCEMENT OF SECURITY INTEREST ACT, 2002 READ WITH PROVISION TO RULES 8(6) OF THE SECURITY INTEREST (ENFORCEMENT) RULES, 2002 KÜBOK E-AUCTION AJANGA KIOJEN AYOKTSÜ NOTICE**

Public aser talisa sen apur (tem) aser Guarantor (tem) dang ya sangdonger, tsüinglanglen metetdajka aliba kiojen koba Secured Creditor dang mortgaged/charged süa liasü, iba ya Canara Bank nung Authorised Officer-i agiadokogo aser iba ya sen apur aser guarantor-i Canara Bank Branch nem agütsütsü aliba sentsüh alangzütsü atema "Kong aliar yamaji" aser "Yangji aliba ajak" basis nung 25.03.2026 anogo nung ayoktsü.

Earnest Money Deposit (EMD) ji 25.03.2026 nü anüingdang 11:00 ako tashi nung agütsütsüla. Auction ji "Online E-auctioning" ajanga website: <https://baanet.com/>, nung asütsü Auction anogo aser mapang: 25.03.2026 nü anüingdang 11:00 ako nungi nikongdang 12:00 ako tashi (sale matem tashi minute pongungu (5) atsülangtsü). Branch, sen apur/guarantor, liability, kiojen osang aser EMD, reserve price:

Sl. No.	Name & Address of Secured Creditor/Branch Name of Borrower / Partner / Guarantor	Brief Description of Immovable Property	(A) Total Liabilities (Rs): (B) Reserve Price (Rs): (C) EMD (Rs): (D) Increment Amount (Rs):
1.	Canara Bank, Specialised ARM Branch, Guwahati, 2nd Floor, Dee Bee Grande, Panjabari Road, Six Mile, Guwahati-781022. Shiniho Kakhetto Jakhalu, S/o Shiniho, Marble and Granite House, Purana Bazaar, Kohima Road, Dimapur, Nagaland, PIN- 797112	Land measuring 1 Bigha 02 Katha 10 Lechas (200 ft * 180 ft = 36000.00 Sqft) situated at Thilixu, 3rd Mile Block-IV, Bye Lane 5 under Revenue Circle-Dimapur Dist-Dimapur, Nagaland in the name of Mr Shiniho Kakhetto Jakhalu. As per land allotment order SI No. 90 dated 25.05.2012. Bounded as under :- North: Approach Road, South: Fishery, East: Paddy Field, West: Holihehi.	(A) 87.54 Lakh (B) 92.96 Lakh (C) 9.30 Lakh (D) 0.50 Lakh

Iba kiojen ayoktsü dak sendakba telatetbatem tejangjaji Canara Bank indang website ([www.canarabank.com](http://www.canarabank.com)) nung link "E-Auction" nung angutsü mesüra Branch Head of Specialized ARM Branch, Guwahati, 2nd Floor, Dee Bee Grande, Panjabari Road, Six Mile, Guwahati, PIN-781022 den Contact No. +91 9971343295 ajanga office hours nung tongteprateptsü akok.

Date: 27.02.2026, Place: Guwahati

Authorised Officer, Canara Bank

**URGENT SALE**

**Maruti Van Model - 2026**

**Colour - Blue**

**Price - Rs. 1,70,000/-**

**Contact No. 9862387389**

## Lovlina & Nikhat nati anir India team Asian Boxing C'ships asayatsü



Lovlina & Nikhat

**Tsüklai/February 28, 2026**

**(Agencies):** Olympic medallist Lovlina Borgohain aser world championship anaben koker alila Nikhat Zareen nati anir India nung asay 20 Mongolia nung March 28 nungi April 11 tashi Asian Boxing Championships asayatsü.

Ita tepeyong asyartem asadanga sülen squad ya shimogo aser January ita National Championships asayaba sülen asyartem Patiala nung national camp atema adenshiogo.

Commonwealth Games aser Asian Games atema agizüker aliba weight category tem nung Asian Boxing Championships nung final tonga asayar alirtem iba asayamung nung indang indanga asayatsü maongka angutsü.

Iba continental asayamung ya medal angutsü aser tarutsü

nung asayamung balala atema tongtibang qualification asayamung ka lir.

Lovlina (75kg), shibai tawa Spain nung Boxam Elite Championship nung gold medal nguogo, lai anir tetsür asyartem asayatsü, kong Preeti (54kg), Arundhati Choudhary (70kg), aser Priya (60kg) nung densema lir. Parnok asempronglai Spain nung gold medal ngua liasü.

Tetsürtem rongnung ano reigning world champions Minakshi (48kg) aser Jaismine (57kg) nata densema lir.

Tanga category nung World Boxing Cup Final gold medalist Nikhat Zareen (51kg), Ankushita Boro (65kg), Pooja Rani (80kg), aser Alfiya Tarannum Akram Khan Pathan (80+kg) nung densema lir.

Teburtem asaya ya World Boxing Cup Final and Boxam

Championship gold medallist Sachin (60kg)-i anir asayatsü.

Pa den Akash (75kg) aser Deepak (70kg) aser Ankush (80kg) nungera densema lir, shirnoki Spain nung takok tajung nguogo.

Squad nung ano Jadumani Singh Mandengbam (55kg) Vishwanath Suresh (50kg), Aditya Pratap Yadav (65kg), Lokesh (85kg), Harsh Choudhary (90kg), aser Narender (90+kg) nung densema lir.

Asyartem ya head coach Santiago Nieva (tetsür) aser CA Kuttappa (tebur) nati anir asadanga liasü.

Spain nung Boxam Elite nung gold mdal teku anguba sülen India team tang iba asayamung nung shilem agitsü lir.

Asian Boxing Championships atema Indian Squad:

Tebur: Vishwanath Suresh (50kg), Jadumani Singh Mandengbam (55kg), Sachin (60kg), Aditya Pratap Yadav (65kg), Deepak (70kg), Akash (75kg), Ankush (80kg), Lokesh (85kg), Harsh Choudhary (90kg), Narender (90+kg).

Tetsür: Minakshi (48kg), Nikhat Zareen (51kg), Preeti (54kg), Jaismine (57kg), Priya (60kg), Ankushita Boro (65kg), Arundhati Choudhary (70kg), Lovlina Borgohain (75kg), Pooja Rani (80kg), Alfiya Tarannum Akram Khan Pathan (80+kg).

## Jammu & Kashmir-i tang mezüngbuba Ranji Trophy kokogo

**Tsüklai/February 28, 2026**

**(Agencies):** Jammu and Kashmir (J&K)-i otsü tasen ka yanglua tang mezüngbuba Ranji Trophy kokogo. Jammu and Kashmir atema Ranji Trophy 2025-2026 nung iba ya nukjidong atalokba ka liasü, kechiyong parnok iba season nung mezüngbuba final tonga atu aser takoka ngua liasü.

Karnataka den asaya ya draw nung tembang saka mezüngbuba innings nung parnok run timba asüba agi parnoki asaya koka liasü.

Iba final asaya ya parnok asoshi Ranji asaya nung asaya 346buba aser asaya 47buba

akokba liasü. Season tepeyong nung Jammu and Kashmir-i Srinagar nung Mumbai den asaya dang mekoki liasü.

Iba asayamung nung Auqib Nabi-i team asoshi kanga tongtibang shilem agiogo, shibai season tepeyong nung wicket 60 agia liasü. Pa ya iba asayamung puti otsü nung season ka nung wicket 60 mesüra iba dang timba agiba tasembuba asayar lir.

Final asaya ya Jammu Kashmir-i amokbanger asaya aser mezüngbuba innings nung parnoki run 584 yanglu. Parnok rongnungi Shubham Pundir-i century yanglua liasü.

Karnataka team nung KL Rahul, Mayank Agarwal, Devdutt Padikkal, aser Karun Nair nung amala nungtugu asyartem lir, saka parnoki J&K attack nem kecha telangzüba magütsütet. Auqib Nabi-i wicket pongu agi aser Karnataka-i run 293 dang yanglutet, kong Mayank Agarwal kijai run 160 yangluba densema lir.

Tanabuba innings nung Jammu Kashmir captain Paras Dogra-i run 342 yangluba sülen declar asü. Parnok rongnungi Qamran Iqbal-i run 160 yanglu.

Langa aliba ama Auqib Nabi nem player of the series narokim agüja liasü.



Advisor to the Chief Minister aser IDAN, mendenbuba Abu Metha aser DGP, Nagaland Rupin Sharma, IPS nati 1buba Nagaland Police Inter-School Sports festival nung overall champion nem takok marok agütsüba noksa nung angur.

## Benfica-i fans pongu nem tenokdangba agütsüogo

**Tsüklai/February 28, 2026**

**(Agencies):** Benfica-i Hokolbarnü sangdong ka ajanga, iba ita Champions League mezüngbuba leg nung Real Madrid makokba asaya nung asayar ka tiluja jembiba atema fan pongu nem tenokdangba agütsüogo, ta metetdaksü.

February 17 nü Madrid makokba asaya nung mepetmesü tulu adoka liasü. Real Madrid nungi asayar Vinicius Junior ya Benfica nungi asayar Gianluca Prestianni-i racial abuse asüba sülen iba mepetmesü adoka liasü.

"Disciplinary inyakyim ka benoka inyakba sülen Benfica-i züngsem pongu nem tenokdangba agütsüogo aser parnok indang red pass tem


thitsüogo," ta iba Portugal club yagi sangdong ka ajanga metetdaksü.

"Benfica-i tangar mezüngmeshia amshiba mesüra racism khenyongi magizüker aser club, asaya aser lokti tatemdandak raksatsüba yimayimpongtem khenyongi magizüktsü ta nenshia metetdaksür," ta European Cup anaben tashi koker aliba team yagi ashi.

Iba asaya nung Vinicius-i goal ka idaktsü aser iba sülen pa tilutsüba atema asaya ya minute 10 tashi sota liasü.

Bodhbarnü tanabuba leg asaya-a Madrid-i kokogo aser parnok aggregate nung 3-1 agi round of 16-i iogo. Iba asaya nunga Vinicius-i goal ka idakja liasü.

## Oman team nung head coach Sulakshan Kulkarni kümogo



**Tsüklai/February 28, 2026**

**(Agencies):** Taoba mapang Mumbai team wicketkeeper Sulakshan Kulkarni, Oman tebur cricket team head coach kümogo.

2026 T20 World Cup nung Kulkarni ya deputy head coach liasü, saka Sri Lanka nung head coach Duleep Mendis ya Oman Cricket nung 'Chief Development Officer' akümba sülen pa head coach asütsü shimogo.

Kulkarni shimba osang Honibarnü sangdongba mapang Oman Cricket-i, "Oman Men's National Team Head Coach mapa abentsü atema Sulakshan Kulkarni shimba pelashishia sangdonger. Pa tajangshiba aika bena aliba aser asaya koknüba tejangraba aliba nisung ka lir aser pai Oman team putu tasenba kati anitsü," ta ashi.

"Küm 14 sülen Duleep Mendis Oman Cricket indang Chief Development Officer kümogo aser pa lenisüba nung Oman cricket takok nung aruogo. Pai national team aser linük nung iba asaya terenlok nung kanga kongshio, koba medemdangtsü makoktsü," ta kasa sangdong ajanagsa metetdaksü.

"Pa melena inyaktsü ya

temela masütsü. Mendis-i Oman cricket renloka aoba nung tongtibang shilem agiogo. Head coach ama inyaktsü asoshi iba maongka agütsüba atema ni Oman cricket dang kanga pelar," ta Kulkarni-i Oman nungi TOI dang ashi.

Kulkarni asoshi mapa tongtibangtibaji Oman taruba küm 50-over World Cup atema qualify südaktsütsüba ya asütsü. Oman team taruba ita Nepal aser Namibia nung ICC CWC League 2 Tri-nation series asayatsü.

Oman team-i taküma T20 World Cup nung junga masayatet aser parnok-i Australia, Zimbabwe, Sri Lanka, aser Ireland nung mekoki liasü.

Kasa mapang nung Kulkarni ya 2024-25 season nung Maharashtra Ranji team indang head coach liasü. Maneni pa ya taoba mapang Mumbai, Tamil Nadu, Vidarbha aser Chhattisgarh indang head coach liasü.

Taoba mapang Mumbai wicketkeeper-batter, shiba First-Class asaya 65 aser List A asaya 13 asayaogo, Head coach ama pa lenisüba nung Mumbai team-i 2012-13 season nung Ranji Trophy title 40buba bena liasü.

## BILEMDANGANG

"Tsüngrem dak metalokertem tia tensa ajak nung anisüngzük angur."